

**Zeitschrift:** Igl Ischi : organ della Romania (Societat de Students Romontschs)  
**Herausgeber:** Romania (Societat de Students Romontschs)  
**Band:** 58 (1973)  
**Heft:** 1

**Artikel:** Clau Maissen  
**Autor:** Pfister, Alexander  
**DOI:** <https://doi.org/10.5169/seals-882063>

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 26.07.2025

**ETH-Bibliothek Zürich, E-Periodica, <https://www.e-periodica.ch>**

# Clau Maissen

(reflexiuns da Alexander Pfister)

Stau destinau a sias uras per ina scartira festiva R. Vieli sin ses 60 onns.

## *Origin e carriera*

Clau Maissen ei naschius gl'onn 1621 a Sumvitg. Tgi ses geniturs ein stai, savein nus buc. Ina supposiziun di ch'el seigi il feagl da quei Clau che ha fatg gronda canera ellas dispetas da 1634, mo ina supposiziun ei aunc buca historia ni verdad historica. Ils Maissens ein representai el 16avel tschentaner entras il bandierel ni bannerherr Gudegn Maissen a Trun, lu tras Luci e Vincenz Maissen ellas gliestas da pensiuns franzosas 1565, 1569, tras Riget Maissen 1565, 1569 e Geli Maissen, il cauderschader 1562, 1565, 1569 e 1603 e 1604 sco bien amitg da Vaniescha. Igl onn 1587 vegnan numnai il salter Geli Maissen, Placi Maissen, Giacun Maissen, bandierel Gudegn Maissen, tuts dalla Cadi e Placi Maissen da Glion ni dalla Foppa. Mo la derivonza da quei Clau ei buca eruida. Eis el propi staus il feagl d'in pauper pur? Els gronds vischinadis sco a Sumvitg surdava la Frontscha ad in um da confidanza da recrutar ed encurir dad engaschar giuvens per l'armada franzosa ni per ils regiments svizzers e grischuns en Frontscha, aschia ils Maissens a Sumvitg. –

Clau Maissen ha passentau ses giuvens onns a Sumvitg. Lu va el en Valtolina. Mintga guvernatur ch'arrivava ils dis da s. Gion a Sondrio, era accumpignaus da siu vicari (inquisitur e derschader), da siu cavalier e sia survitid, savens era da sia dunna e ses affons. Il cavalier sco il vicari stuevan esser dil medem cumin sco il guvernatur ed era esser eligi da quel. Il cavalier cumandava ils sbiers (la polizia) ed haveva beinduras da remplazar il guvernatur. La mira da guvernatur, cavalier e podestats era da far rauba. La piazza da guvernatur vegneva pagada cun 1600 renschs ad onn, cun ils quals el pagava il cavalier, il cancelier, ils tenents (= litinents), ils sbiers e la survitid. Quei tunscheva buca lunsch. Mo guvernatur e podestats s'enrihevan da sportlas e castitgs per mintga trapla. El saveva era midar las peinas da perschun en talas da daners. Il medem fageva il cavalier. Naturalmein vegnevan ils biars cass nuota nudai e nus savein mo considerar ils fretgs. Maissen ei returnaus a casa da siu uffeci sco cavalier cun gronda rauba. El ei leu sil pli tard entuorn 1650. El fa lu enconuschientscha dil plevon a Sedrun, dr. Mattias Sgier. Quel sa duvrar in um

grond e ferm, rutinaus per nauschas intrigas tras la veta en Valtina, pertgei el ha ina missiun digl ambassadur spagnol, Casati, pauc edificonta per umens undreivels. El duei cumbatter il mistral Conradin de Castelberg a Mustér e procurar che quel vegni buca eligius pli mistral ed era buca en uffecis en Valtina; pertgei el hagi luvrau per la Frontscha. En verdad ina tschuffa intriga politica. Sgier e Maissen lavuran ussa ensemen. Conradin de Castelberg vegn scurvanaus avon il pievel, e Sgier e Maissen han bien success. Castelberg vegn buca confirmaus sco mistral, sco usitau. Maissen vegn eligius mistral (1651). El vegn puspei confirmaus 1652. Quels dis marida Maissen Catrina Waller da Sumvitg, ed il zercladur 1653 ha el da battegiar il feagl Adalbert. Quel survegn siu num suenter igl avat Adalbert I Bridler e quel fa padrin. Conradin de Castelberg ha battiu sco mistral pils interess dil cumin encunter la claustra ed igl avat Adalbert I Bridler, surtut en damondas che pertuccavan il domini claustral. Igl avat semetta ussa ensemen cun Sgier e Maissen e selai cusseglar da quels. Igl onn 1653 suonda Florin Jacumet sco mistral e Maissen sa buca far il davos pass dalla scala da dignitads dalla Cadi si. 1655 miera Adalbert I Bridler e sco successur vegn Adalbert II de Medell nominaus (Sur Adalbert I Bridler e siu temps legia la famosa lavur da P. Iso Müller. Die Abtei Disentis 1634–1655).

Adalbert II de Medell ei in um da 28 onns, ei bein scolaus ed enconuscha da rudien la claustra, ils purs e signurs dalla Cadi. Ad Adalbert I renfatschavan quels ch'el seigi in jester e capeschi buca ils Romontschs, lur vers dretgs e lur far e demanar. Adalbert de Medell veva passentau sia giuventetgna en Tujetsch; sia mumma era la sora da Conradin de Castelberg (Joachim de Medell e Cornelia de Castelberg). Il frar dad Adalbert era Conradin de Medell, maridaus cun Margreta Jacumet, mistral 1668, 72, 82, 83 e cauderschader 1678, 1684, morts 1691.

Cun agid dad Adalbert II de Medell leva la curia romana exequir il vegl plan da 1641 (!) e pagar ina buna part dils gronds deivets digl uestgiu a Cuera e sedeliberar dils crediturs protestants che savevan in bi di periclitare l'existenza digl uestgiu. Igl uestg Gion Flugi VI d'Aspermont dueva exequir il plan da Ruma, tenor il qual las claustras da s. Gagl, Faveras, Nossadunnaun e Muri duevan sorprendere il deivet tenor las forzas da mintgina. Mustér dueva p.ex. contribuir 2000 renschs. Persuenter vess lu la claustra da Mustér survegniu in diember dallas pleivs en Surselva enstagl igl uestg. Ella vess saviu nominar ni presentar il plevon e surveglar quel e sia pleiv. Il niev avat Adalbert ei sesuttamess senza far liungas als camonds dalla Curia ed ha preparau ils daners pretendi. Igl uestg Gion Flugi cloma en agid Sgier e Maissen tenor il recept da Casati. Quels dus

umens deien urdir culs plevons dallas pleivs en Surselva ina viva resistenza encunter Ruma e declarar: «Nus mein buca sut la claustra ed igl avat». Quei daventa cun gronda rutina e bien success. Era ils umens da cumin ston crer tut las tiradas da Sgier e Maissen. Sil cumin da 1656 vegn la sbarrada da Sgier e Maissen producida. Gion Flugi ei vegnius tier siu intent. Ruma ha stuiu far concessiuns plaun e plaun e Flugi ha turschau vinavon la broda, ha gudiu la veta a Fürstenburg ed en auters loghens e periclitau l'existenza digl uestgiu (Rapport dil nunzi Carlo Caraffa dils 30 da settember 1654 e la brev digl avat Adalbert dils 7 da december 1655, concernent quella damonda digl uestgiu a Cuera). Castelmur<sup>1)</sup> ha buca examinau las relaziuns da fundament. Ils merets da Sgier e Maissen ein strusch aschi edificonts e honorifics sco quei che Castelmur vul far valer. – Maissen spetga novas honors.

Entuorn 1658 e 60 entscheiva la Frontscha ina nova acziun; ella vul eliminar l'influenza dalla Spagna el Grischun e puspei surprendre la protecziun politica e militar dallas Ligias, sco sut Rohan avon la capitulaziun da Milaun 1639. Ils vegls amitgs dalla Frontscha sereghegian per demusar lur simpatia e buca piarder lur plazzas militaras dad officiers e lur truppa en Frontscha, aschia Conradin de Castelberg, de Mont, Schauenstein e surtut ils Salis. Casati, igl ambasadur spagnol fa tuts sforzs per mantener ils vegls amitgs che han quasi tuts truppa, ina cumpignia, ni silmeins ina mesa ni ina quarta, a Milaun. Maissen observa cun egl aviert tut il far e demandar dils menaders e da Casati en quels dis da 1658 e 59, s'avischina als Latours da Breil, che domineschan la politica ella Cadi da quei temps. Per 1660 ei Ludivic de Latour gia destinaus da Casati sco landrecht. Igl avat Adalbert e siu frar Conradin han buca schau plascher las sbarradas da 1651 e 56, ils Latours san pia tolerar Maissen ni cumbatter el. Maissen e Duitg de Latour han endamen dils interess da mintga part e fan lu ina cunvegnientscha arisguard ils uffecis, sco quei vegneva fatg savens da quei temps e pli tard ellas Ligias. Tras Duitg de Latour (1616–1684) sesarva ussa la via per la carriera da Maissen. Da l'autra vart manteneva Duitg de Latour era bunas relaziuns culs Castelbergs e de Medell e gl'avat era staus padrin da siu fegl Adalbert ils 22 da december 1657. Duitg era plinavon ferm attaschus a Casati ed alla Spagna e saveva arver la via a Maissen era cheu. 1660 ei la Dieta dallas Ligias seradunada a Glion. Duitg de Latour ei dapi s. Gieri cau dalla Ligia. Sustenius da Casati seprepara Gallus de Mont da vegnir cauderschader, e Maissen sesa ussa cun Sgier cheu ella societad dils «Spagnols». Casati dat ils daners a de Mont per vegnir landrecht ed el lai era surdar ina recumpensa a Maissen tras siu amitg Sgier. Casati spera ch'el vegni ad esser in bien agid pigl

avegnir, surtut en quei mument che la Frontscha daventa pli e pli preten-siusa. Ils Latours seregordan da lur plaid daus a Maissen e 1663 propona igl avat per la fiasta da s. Gieri Maissen sco landrechter e 1665 astga el ira sco guvernatur en Valtlina. Sut l'influenza da Duitg de Latour ha igl avat dumignau sia aversiun encunter las operas da Maissen da 1651 e 56, e Maissen renconuscha la valeta da bunas relaziuns cugl avat e sche pus-seivel cul frar da quel, Conradin de Medell. El damonda cuort suenter gl'avat padrin da siu pli giuven fegl Nicolaus u Clau.

### *Fortuna en Valtlina*

Suenter siu bienni sco cauderschader sa el cavalcar da s. Gion (24 da zer-cladur) 1665 a Sondrio, accompignaus dils mats da Sumvitg tochen sils cunfins dil cumin e da leu aunc da tut sia suite e prender igl uffeci da gu-vernatur ord ils mauns dils sindicaturs. La detga resda, ch'el hagi schau clamar in da ses adversaris da siu temps da cavalier, pia circa dils onns 1648 e 49. A quel hagi el mussau la cusadira da siu tgau, che siu adversari veva caschunau tras ina frida en in cumbat. E lu hagi el mortificau quei pauper subdit. Detga ni anecdota ein buca historia, ellas san denton bein-duras caracterisar las persunas, dallas qualas ellas resdan. Enconu-schents ha el anflau a Tirano, e savens ha la via carteivel menau el si a Ti-rano el palaz dils Salis tier capitani Gion de Salis (1625–1702) e sia fami-glia. Sia dunna era da Mesauc. Gion de Salis era fegl dil convertit (1622) Rudolf Andreas de Salis, deputaus 1638 en Spagna per tractar la pasch, damai ch'el era colonel. Quei Rudolf Andreas veva maridau Hortensia Sa-lis (+ 1646), sora das Ulysses Salis-Marschlins, marschal en Frontscha. Capitani Gion de Salis habitava la gronda part digl onn a Tirano. En sur-vetsch dallas Ligias era el staus guvernatur e president dalla sindicatura. Mo Casati ha negina simpatia per el. El di da Gion de Salis: «si tratta d'un soggetto, secondo la communa voce di popolo nei Griggioni privo d'ogni legge di coscienza, riputatione et verità et tutto impostato ... Salis possa staccarsi di questa casa non havendo altro appoggio per sostenere le Ti-rannie commesse nella Valtellina et il sangue suechioto da quel povero Paese, ove in meno di trent'anni si fa conto habbi ammassato una facoltà molto maggiore di duecento mila scudi» (Casati ils 11 da zercladur 1677). Salis veva cumprau tontas vuschs els cumins ch'el veva ina gronda in-fluenza sils uffecis ch'ils cumins vevan da surdar (Casati, ils 8 d'avrel 1677). El saveva aschia sorprendere savens uffecis sco provisur e pagar prezis da 5–7000 renschs, p.ex. per la podestataria da Tirano e lu retrer

daners dils paupers subdits e tuttina far ina tala raubuna (pareglia la brochura: Klagen gegen Johann von Salis 1661). La paga fixada ch'ils subdits stuevan pagar al podestat da Tirano muntava mo a 1200 renschs ad onn. Cun quella veva el buca saviu far rauba; mo el capeva famus il mistregn, e per Maissen era quei era buca niev. Mo da quei stat ei pauc en documents.

All'entschatta da siu operar a Sondrio ha Maissen publicau il scamond da purtar armas als subdits. Quei conclus veva la dieta dallas Ligias priu. Il secund onn ha el ina greva difficultad a Ponte. Leu era il prevost morts, e la pleiv ha eligiu siu successur. Maissen ha pretendiu il dretg da saver confirmar el en siu uffeci ed ei sereferius al capitulat da Milaun da 1639. Gia avon 1620 (la liberaziun dalla Valtina) veva ei adina dau dispetas per via da quella damonda dil dretg ecclesiastic. 1615 veva Gion Tschamun de Florin schau mirar en las portas dalla baselgia parochiala a Morbegno, perquei ch'il niev eligiu plevon P. Alessio Schenardi refusava da pagar la taxa da 600 scudis per sia confirmaziun al podestat Florin da Mustér. Quel haveva scumandau scadin survetsch divin en baselgia ed ei lu suenter liung marcadar secuntentaus cun 160 scudis, pia circa in'entrada annuala dalla pleiv. Ussa leva Maissen, suenter la revoluziun da 1620 e sut il niev capitulat da 1639, puspei profitar dallas veglias prescripziuns e pretendeva perquei il dretg da saver confirmar il niev plevon en siu uffeci, naturalmein cun ina taxa alla moda grischuna. Ils da Ponte han snegau quei, e Maissen ha schau sequestrar tut ils beins e las entradas dalla pleiv. Sin quei han ils clerics da Ponte publicau ina protesta encunter il secuntener da Maissen che corrispundi buc allas leschas ed al capitulat da Milaun da 1639. Maissen para d'haver tenui la dira sco ils Grischuns fagevan en tut cass, per silmeins vegnir tier daners.

### *Els embrugls grischuns*

Per Maissen haveva siu temps a Sondrio giu ina gronda muntada politica. Sias relaziun politics che la convenziun culs Latours veva slargau, ha el affirmau e sviluppu tras las relaziuns culs Salis. Gion de Salis a Tirano era catolics sco siu bab, mo el era in fervent amitg dalla Frontscha sco siu frar, il marschal da camp Gion Rudolf (+ 1690), e veva stretgas relaziuns politics cun siu quinau Carl de Salis a Maienfeld, cun siu nevs Hercules de Salis a Crusch ed ils auters Salis, excepiu Hieronimus de Salis a Seewis en Purtenza che teneva culla Spagna ensemen culs Sprechers a Luzein e Tavau. Gion de Salis e siu frar, il marschal Rudolf, stevan era en re-

laziuns amicablas culs de Mont (Gallus de Mont era staus podestat a Tirano). Igl emprèm feagl da Gion de Salis, Simon, ha maridau quels onns (entorn 1637) Maria Elisabet de Mont, ina feglia da Gion Heinrich de Mont, biadia da Gallus, e pli tard marida ina secunda de Mont il feagl dil marschal Rudolf de Salis a Zezras. Quels ligioms da Maissen culs Salis e cun ils de Monts ein stai da grond'impurtonza, cura che la Cadi ha fatg process cun el, pertgei ils Salis dominavan lu la dieta pervia dalla parentella e dalla cumpra dallas vuschs. Quei era in ton politica ed in ton speculaziun finanziaria. Cumpravan els in cumin suenter l'auter cun dar empau daners a mintg'um che votava per els, empau dapli als menaders, sche savevan els disponer, tgi survegni ils uffecis en Valtina ni sezs surprender igl uffecis sco provisurs ed aschia puspei vegnir tier lur daners cun empau gudogn vitier ed ultra da quei devan els als representants dils cumins la cunzina, co ei vevan da votar alla dieta. Tenor ils rapports da Casati veva Gion de Salis cun sia raubuna cumprau en quella moda ina buna part dallas vuschs alla dieta. Ils Salis e lur partida vevan aschia ina segira pluralità. Opposiziun fageva lu igl avat da Mustér, ed el vev'adina ina grond'influenza, mo buca la pluralità; quella era buca pussevla ad el. Naturalmein era la greva attacca sigl avat tras Maissen beinvegnida als Salis ed a lur tendenzas. Ils Salis ein pia semess ensemen cun Maissen ed han instruiu lur adherents ni plitost dependents da sustener sia causa e quei ha giu per consequenza che las Ligias han stuiu tractar la causa ed han tratg quella vinavon ed alla liunga, senza denton saver decider encunter vegl dretg ed encunter il cumin da Mustér e sia dertgira criminala. Gallus de Mont veva zatgei differenzas culs Castelbergs e de Medell, ni ch'ei se-tractava plitost da piccas denter quels gronds. Quei era denton ton pli pesont, damai ch'era igl uestg Ulrich de Mont (1661–1692) stueva cantar la medema canzùn e tener culs de Monts e cun lur parents, culs Salis-Zezras e quei ton pli ch'els eran dependents dalla favur dils dus marschals (Zezras e Marschlins) arisguard lur survetsch militar en Frontscha. Alla parentella dils de Mont e de Salis appartenevan era ils de Schauenstein (da Summaprada sur Cazis e lu da Ehrenfels sur Seglias en Tumliasca eran els setratgs en lur signeradi a La Punt). Era quels eran catolics, mo franzos ella politica e tierparents dils Salis-Zezras. Quellas pussonzas stevan davos dies a Maissen. Igl ei buca da sesmarvigliar, che Maissen prendeva adina nova curascha ed ils de Latour, de Castelberg e de Medell havevan mal dil far gia dall'entschatta enneu e stuevan prender risguard da quella situaziun. Sgier enconuscheva quella gronda inegualità dallas forzas, e vegnend el lu pli tard 1674 administratur da Razén, han aunc ils cumins da quei signeradi priu partida per Maissen. Casati, gl'ambassador

spagnol, sebasava sin Gallus de Mont da Schluein (Löwenberg + 1634) e teneva quel per igl um il pli prudent e cun la pli gronda influenza egl uestgiu e tier ils catolics, e Maissen per in um da grond interess. Per la Spagna e siu ambassadur Casati fuss la pasch naturalmein stada beinvegnida e vess surviu alla Spagna, mo el stueva far persenn, co Maissen e Sgier s'approximavan pli e pli als Salis ed a lur adherenza per vegnir a lur intent.

Da s. Gion 1667 ha Maissen puspei surdau siu uffeci al president dils sindicaturs ed à ses 8 commembers ed ei returnaus a Sumvitg, accumpignaus d'in da ses sbiers, cul num Carlo Orso ni Oris. Leu ha el construì sia casa. 1669 haveva la Cadi dad occupar ils uffecis da vicari e duas sindicaturas. Il magistrat ha offeriu quellas plazzas a Maissen, a Duitg de Latour ed al burser Gion Fontana. Il vicari stueva enconuscher bein il dretg per saver menar las inquisiziuns tier delicts criminals, el stueva pli da vegl esser doctur dil dretg ed haver l'approbaziun dils subdits ni dil cussegl da vallada. El retargeva 880 renschs paga, leutier benefecis e sportlas. Quei tut eran buca pretensiuns e relaziuns per Maissen, tonpli ch'il vicari veva buca tonta caschun da far daners ed era ils sindicaturs buc. Aschia savevan ils 1500 renschs ch'il cumin dumandava per quei uffeci strusch far queidas a Maissen. Quel haveva auters patratgs, el speculava sigl uffeci da cauderschader ni landrechter per 1669. Quei onn veva igl avat da proponer il candidat da s. Gieri a Trun. Casati ha puspei furniu ils daners per ils electurs. Stiafen Muggli da Domat, ch'era staus landrechter 1665 e mistral Cristian de Florin da Mustér han susteniu Maissen il pli ferm. Muggli era pauc scaldaus per la partida spagnola, el er'adina staus dependents dils Plantas a Razén, surtut da mistral Ambrosius Planta (Casati dat quels dis a Maissen 322, a Muggli 322 ed a Florin 276 renschs). Latour setegn vid la convenziun cun Maissen da 1559. Mistral Conradin de Medell ei dapi 1668 en uffeci e fa buc opposiziun. A Sumvitg viveva Maissen cun sia famiglia en sia casa nova ed el era prompts dad augmentar siu possess e sia influenza. La vischnaunca da Sumvitg stueva era sentir siu character decidu e pli e pli despotic. El ha dumandau da ses convischins l'alp «Crap Ner» ch'els han cediù en tutta humilitonza encunter in regal da 300 renschs alla baselgia parochiala. En numerusas familias dumandava ins el padrin, seigi quei per sperar in bi biemaun ni sia favur e protecziun, ni per esser preservaus da sia malaveglia. En quei temps ha el era acquistau il bogn en Val Sumvitg. Mo cuntents e ruasseivels en siu possess, en sia dignitad era el buc. El temeava per la favur dil pievel, per sia dignitad, el senteva schizun en prighel da veta. El tgisa Giacun de Tuor, essend che quel prepari in attentat encunter el. E Tuor vegn arrestaus ed examinaus

dil cumissari dallas Ligias a Clavenna (1670) (Castelmur p. 27, 54, 63). Quellas caussas derivavan dils dis a Sondrio 1667.

Igl onn 1671 ha la Frontscha puspei dumandau truppa e Casati sevolva a ses amitgs per cumbatter ils interess franzos. Era ina dispeta cun Schons veva lu fatschentau la Surselva (Castelmur p. 29). En tut la politica dalla Surselva e specialmein dalla Cadi fugava aunc adina il cuntrast dils onns 1551 e 56 e Maissen cun siu stermentus temperament, sia gronda ambi-ziun nutreva la pissiun sedestedonta. Casati da sia vart veseva mo ils interess spagnols encunter ils interess franzos e giavischava la perinadad denter ils catolics per survir alla Spagna. El vess bugen reconciliau gl'avat e siu frar cun Maissen (Casati al guvernatur a Milaun ils 20 da schaner 1671 e 30 da nov. 1674). Era il nunzi leva unir ils umens ella Surselva ed ei ius perquei a Mustér. A Cuera han Sgier e Maissen vuliu surplidar el da buca visitar igl avat. El ha cuntinuau siu viadi ed anflau che la cuolpa seigi Maissen. Cun siu spért despotic vegli el tener suten ils parents digl avat (Conradin de Medell). Las persecuziuns ein idas vinavon. Da s. Gieri 1672 vegn Maissen puspei landrechter. Igl avat Adalbert ed ils Latours cun lur cunvegnientscha da 1559 han salvau la pasch, schegie che Conradin de Medell era staus 1668/69 mistral e vess bugen cuntinuau sia carriera. Principalmein cun risguard da Maissen ha el stuiu spitgar tochen suenter la mort da quel (1678). Quei onn, 1672, ei la dispeta pervia dils paders caputschins a Tumeagl vegnida tratga a strada. Ils protestants, menai da burgamester e caupresident dalla Ligia dalla casa da Diu a Cuera, Gion Gudegn Capol da Flem e dad auters han pretendiu, ch'ils paders caputschins a Tumeagl vegnien relaschai e dapli che la Curia a Ruma empermetti da buca scaffir in cumissariat papal per la Valtlina. Gion de Salis a Tirano, «quasi tiranno della Valtellina» veva dumandau in vicariat general dil nunzi Borromeo per saver preparar quei uffeci a siu parent igl arciplevon a Sondrio e cheutras saver dominar la Valtlina era dalla part ecclesiastica (Casati ils 13 d'uost 1664). Ei mass memia lunsch da raquintar il svilup dalla dispeta per ils paders a Tumeagl. Maissen, lu cauderschader, ha menau la fatschenta corrispudent a siu character eruptiv e demagogic sper Gion de Salis, Zezras-Tirano, Gallus de Mont, Gion Tschamun de Florin, Muggli da Domat, Schauenstein, Scarpatetti e Sgier. Casati sedava gronda breigia dad intermediar denter las confessiuns e veseva cun grevs quitaus la tempra da Maissen e siu operar – en uniun cun Sgier. Auters, sco Gion de Salis, Schauenstein e Muggli inclinavan empau per risguards franzos e protestants. Maissen ha raccoltau reproschas en tut quella historia e strusch demussau ch'el uneschi sia part sco cau dalla Ligia en buna harmonia. Siu character rendeva quei nunpusseivel. Casati veva scret

gia ils 7 d'uoost 1665 a Milaun: Landrichter Gallus de Mont «presto ha la maggior adherenza dei cattolici e fù sempre capo della nostra fattione in detta lega». Maissen aveva bein la voluntad sincera da survir en quei fatg cun Sgier agl uestg ed alla part catolica, mo el saveva buca tener me-sira ed era stinaus e buca tractabels. Igl uestg e Gallus defendevan bein el, mo Maissen pretendeva, ch'el vegni persequitaus e seigi en prighel da veta. Ver eis ei, che la tempra sbuserada e l'ambiziun lubevan buca ad el da prender risguard human da siu concarstgaun. Essend la pissiun dad omisduas varts carschida, temevan ins che la dispeta meini ad in'uiara confessiunala, e per quei motiv ei Sgier vegnius tarmess a Milaun per du-mandar daners e muniziun. Leu ha el, che mava tuttavia d'accord cun Maissen, lamentau da Casati e sias emprovas da pacificar las parts e lu empruau dad eliminar Casati ord las Ligias. Quei era bein era la veglia da Maissen (Alfonso Casati, ils 18 d'october 1673 e 20 da november 1675). Quei ei buca reussiu, mo Casati ha intervegniu tut e denter Sgier, Maissen e Casati han strusch existiu pli relaziuns sinceras il temps suandont. Naturalmein stueva Casati far la gatta morta e quescher, pertgei el stueva haver ensemen ils amitgs dalla Spagna, e quels giavischavan da mante-ner lur entradas ed il susteniment dalla Spagna, per puspei vegnir tier lur uffecis e honors. Vegnend la cumpignia da cumissari Travers a Milaun surdada al barun Gion Heinrich de Planta-Razén quels dis, ei Travers era daventaus in inimitg incarnau da Casati, al qual el renfatschava d'haver cussegliau quella midada a Milaun (Casati, ils 2 da settember 1673, ils 20 da november 1675). Mo Gallus de Mont ha capiu da mantener la confi-donza da Casati e da Milaun tochen la mort. El susteneva la carriera poli-tica da siu schiender Gion Gudegn Capol a Flem ed ha proponiu el sco cauderschader (Casati, ils 18 da fenadur 1673) e dava tuts buns cussegls a siu tierparents, uestg Ulrich de Mont per sia tenientscha politica, che li-giava quel cun Gion de Salis e siu frar, marschal Rudolf ed auters Salis e cun Schauenstein en buna parentella ed amicezia (Alfons Casati, ils 7 da schaner 1677). Il fundament da sia politica, quei saveva Casati, era final-mein tuttina las bunas relaziuns culla Spagna. Sgier e siu attaschau Mais-sen seschavan denton direger memia ferm da lur pissiun e preponderon-za en tuts fatgs.

#### *Ils adversaris serimnan*

En quels onns, surtut duront il cumbat per ils paders caputschins, ha Maissen fatg biars inimitgs e quels, seigi catolics ni protestants, eran ferm

decidi da buca pli eleger Maissen els aults uffecis. Cun quei patratg ein els s'uni ils 6 da matg 1674 ad ina convenziun: Silvester de Rosenroll da Tusaun (Baldenstein), Joachim Florin, Florin Schorsch a Spligia, Gion Antoni Schmid de Grüneck a Glion, Gion Gudegn Capol a Flem, Gion Barclamiu de Montalta e Caspar Cabalzar a Lags, Gion Carlo a Marca e Gion Batt. Gioanelli. Ils Latours e de Medell han buca fatg part. Gia 1673 era quella damonda vegnida ventilada. Casati havess giu raschuns persunalas da schar Maissen ella buglia, mo aunc inagada ha el vuliu intervegnir ed intermediar ella greva discordia. El ha perquei influenzau Gallus de Mont, Gioieri, Gion Batt. Camone e Duitg de Latour dad eleger Maissen sco cauderschader. Igl avat veva da proponer quei onn il candidat (1674). Nus stuein supponer che quei seigi era daventau sut l'influenza da Casati e dils de Latour e che Adalbert de Medell hagi aunc inagada presentau Maissen sco candidat per cau dalla Ligia Grischa, pertgei senza quei sustegn fuss in'elecziun strusch stada pusseivla. – Ils 6 da matg han lu ils umens suranumnai, menai probablamein da Capol e dils Schmids de Grüneck, signau la convenziun, per far fin alla carriera politica da Maissen ed a sia prepotenza e garmaschia ellas autoritads. Vargadas las elecziuns vegn ei enconuscent che Maissen hagi scret al cumissari a Clavenna ina nauscha brev che cuntenevi ingiurias sur digl avat Adalbert de Medell (Decurtins, Maissen p. 62)<sup>2)</sup>. Ei para ch'igl avat hagi buca fatg tut suenter il giavisch da Maissen. En mintga cass ha Maissen lavagau las relaziuns cugl avat entras siu secuntener.

Da s. Gieri 1676 ei Gion Antoni Schmid de Grüneck vegnius proponius cauderschader a Glion e cuort suenter, Gliendisdis Tschuncheismas, ha il cumin dalla Cadi eligiu il giuven Caspar della Turre (1645–1692), il fegl de Duitg, mistral. Maissen era senza uffeci, e conta aderenza che restava aunc ad el era buca grev da dumbrar; per el era quei la damonda digl avegnir. Castelmur pretenda en sia monografia tendenziusa sur Clau Maissen, che tut quei che seigi passau tochen quels dis, hagian ils adversaris da Maissen giu preparau ad el, per ruinar quei um totalmein, surtut duei igl avat cun siu frar haver urdiu la sventira da Maissen en quella maniera. Mussaments per quella pretensiun ha Castelmur remarcablamein negins (Castelmur p. 67). Igl ei ina supposiziun. Ina tala ei buca verdad historica. Il lectur fa bein da ponderar la via, las operas ed il character da Maissen e lu giudicar sur sia sort e dumandar: «Nua schaian las fontaunas da sia sort e da sia sventira?». –

Casati vesa quella greva dispeta denter Maissen e gl'avat cun grevs quitaus e mantegn tuttina ina certa reserva, mo en general sto el dar raschunagl avat (Casati, ils 7 ed ils 19 da schaner 1677). El di: «L'abbate Beneditti-

no di Disentis ... tiene il primo voto et una grandissima autorità, con la quala gia molti anni opera in tutte l'occasione al maggior vantaggio del Real servitio, viene hora per causa d'un particolare perseguitato da qualchuno quali con l'assistenza di M. Nontio (che vorebbe far anche questo punto di religione) non puotendo batterlo qui, pensano, per rovinarlo, di farlo citare a Roma, mentre non obbidendo era per venir scomunicato e desposto, e facendolo operarebbe immediatamente contro la Carta della Lega di questo Paese, cosi bene giurata dall'abbate di Disentis quanto dal Vescovo di Coira, la qual lega inhibisce le citatione a Roma, et obliga alla delegatione de Commissarii Pontificii, o sostituiti, che amministrano invece la giustitia qui nel proprio paese». Casati ha cussegliau il guvernatur a Milaun da supplicar il cardinal Nitardi a Ruma da prender quella via legala ni surdar la caussa alla congregaziun benedictina. – Aschia ponderava Casati dalla situaziun ella Cadi. El deplorava, ch'el hagi negins umens da gronda muntada ella Ligia (dapi la mort da Gallus de Mont) e che Gion Gudegn Capol seigi quel che hagi la pli grond'adherenza, ferton che la partida franzosa hagi umens sco Schauenstein, Rudolf de Salis-Zezras e Gion de Salis cun lur gronda influenza (Casati, ils 19 da schaner 1677, ils 11 da mars 1677). En quellas relaziuns entscheiva e cuntinuescha il process da Maissen.

#### *Declin ed assassinat*

Maissen veva buca bandunau siu uffeci da cauderschader, che la dunna da Vincenz Romeias a Sumvitg cumpara avon il mistral en uffeci e porta tgisa encunter Maissen. Gl'onn 1672 veva quel tarmess siu sbier Carlo Orso en casa da Vincenz Romeias e schau sittar giu quel, senza tgisa e dertgira, perquei ch'el dueva ver fatg smanatschas a Maissen. Maissen veva lu schau sequestrar ina part da sia rauba. La dertgira criminala dalla Cadi ha citau Orso per siu delict. El ha par'ei buca confessau, che Maissen hagi dau il camond, quei fageva in sbier buca visavi siu patrùn. Orso ei vegnius bandischaus ord la Cadi, e Maissen ei buca vegnius truaus, pertgei encunter el existeva aunc negina tgisa. Quella sentenza saveva cuntentar ni igl um cumin ni il pievel. – Ussa, suenter quater onns, che la agitaziun encunter Maissen vegneva mendra e mendra, tgisa la dunna da Romeias e di ch'avon quater onns hagi ella survegniu ni agid ni dretg e giustia per respect ni tema avon Maissen. Ussa pretenda ella anavos la rauba sequestrada e damonda aunc ina indemnisaziun da Maissen. Pervia dil mazzament sa ella buca tgisar, pertgei sur da quei delict ha la dertgira criminala

decidiu el process encunter il sbier Carlo Orso. Maissen protesta avon la dertgira civila e sereferescha alla sentenza dalla dertgira criminala, mo el sez cumpara buca avon ils derschaders. El s'excusescha lu che siu advocat Caprez a Trun seigi gest morts, el sez seigi buca preparaus per la defensiun, ed ha lu dumandau prolungaziun dil temps per tractar la caussa pli tard. La dertgira civila ha refusau quei. El ha lu garegiu da clamar ensemen gl'entir cumin sin siu quen, sinaquei che el sappi schar decider il pievel sur sia pretensiun. Era quei ei vegniu refusau, pertgei las leschas dalla Cadi enconuschevan buc in tal proceder el dretg. Il magistrat ha fatg attents Maissen, che el sappi appellar alla dertgira (dils 15) dalla Ligia dalla Cadi en ina caussa civila. Maissen ha refusau da sesuttametter alla dertgira dalla Cadi e declarau quella per partischonta. Cun quella declaronza snega el l'obedienscha allas autoritads dil stadi ed ei culpeivels d'in grev delict politic. Quel meina el avon dertgira criminala. En caussa civila vevan 17 derschaders, il magistrat pign, decidiu; en ina caussa criminala funcziunava il magistrat grond da 40 umens e quei per ordinari a Mustér sper la claustra, sut tschiel aviert. Encunter la sentenza dalla dertgira criminala deva ei negina appellaziun. Maissen batteva ussa buca mo encunter la dertgira, mobein era encunter il stadi dalla Cadi ed encunter sias autoritads e siu pievel, che veva tschentau ellas. Igl interess per la caussa da Maissen ni siu secuntener occupava ussa il pievel. – Tier la tgisa dalla dunna da Vincenz Romeias, ch'era staus in brav um tenor la declaronza da Duitg de Latour avon la Dieta, vegn ussa aunc il plogn per Giacun de Tuor da Sumvitg. Gia 1670 veva Maissen dau ordras al cumissari da Clavenna dad arrestar ed examinar il Giacun de Tuor, fugius lu a Clavenna; pertgei quel hagi conspirau encunter el e vuliu mazzar el. Tuor era vegnius arrestaus, persequitaus e bandischaus ord la Cadi ed ei lu silsuententer morts. Siu parent Benedetg Arpagaus a Sumvitg aveva ussa purtau tgisa avon il Bundstag e lu avon la dertgira dalla Cadi, suenter che Maissen era buca pli ellas autoritads. La sentenza encunter Tuor era vegnida annullada. Sin la pretensiun da Benedetg Arpagaus ha la dertgira civila ussa tractau la caussa e concediu als artavels da Tuor ina indemnisiun da 4000 renschs. Era encunter quei proceder e la sentenza ha Maissen protestau.

Ussa cumpara Maissen a Mustér avon la dertgira criminala e protesta encunter tuttas decisiuns dalla dertgira, declarond che el vegni buca a sesuttametter allas decisiuns dalla dertgira. En num dalla dertgira ha Duitg de Latour declarau l'entira situaziun al pievel present. Maissen rispunda ed anfla aunc susteniment da Camantonia da Panaduz e Zoller da Sur-saissa, ch'eran presents, e Maissen appellescha al pievel. El era aunc per-

schuadius ch'el gaudi gronda confidanza el pievel. Ina appellaziun al pievel enconuscheva la lescha buc, mo la dertgira ch'enconuscheva pér me-mia bein la situaziun, ha encuretgi ina via dalla pasch, ha revocau las sentenzias per in cert temps e dumandau il pievel, schebein el vegli confirmar las sentenzias, mo buc emblidau da declarar che quella via per la giustia corrispundi buc alla lescha. Las vischnauncas han rispundiu, ch'il pievel surlaschi quella caussa al magistrat grond, quei ei la dertgira criminala, che hagi la pussonza da truar sur Maissen sco sur mintg' auter um sin fundament da siu engirament. Per protecziun dil magistrat han ils vischinadis dau 80 umens dil cumin a quel. Maissen ei ussa semess a cavagl ed ei fugius ord la Cadi. Aschilunsch vevan ambiziun e stinadadad menau el. Sia speranza eran ussa Sgier, gl' uestg, ils Salis e lur influenza ellas autras Ligias. Ils derschaders a Mustér spitgavan che tut ils auters cumins ellas Ligias renconuschien il dretg e la sentenza dalla Cadi e dettien ni tetg ni schurmetg a Maissen. Quel ei arrivaus a Razén tier siu amitg Sgier, che administrava il signeradi da Razén dapi 1674 e da leu ha el priu siu domicil a Domat, ch'apparteneva al signeradi.

Razén era dapi 1497 en possess austriac, e l'Austria surschava quei possess a famiglias grischunas, che vevan daners avunda per surdar ina gronda summa per igl impegn al possessur. Quels onns regeva Gion Heinrich de Planta a Razén; el era catolics e dalla partida spagnola. Sco segner da Razén saveva el presentar in candidat sco cauderschader mintga treis onns; el deva sia favur era a protestants. Igl onn 1672 haveva ei dau ina dispeta denter ils subdits (Domat, Panaduz, Razén etc.) e Planta. Ils subdits ein seviults a dr. M. Sgier, e sin sias instanzas ha l'Austria pagau anavos la summa d'impegn e surpriu il signeradi, ed en num digl imperatur ei Sgier daventaus administratur da Razén. Planta leva nuota desister dil signeradi ed ei seviults alla Ligia grisca per protecziun. Quella ha ordinau als subdits dad obedir a Planta e Sgier duei calar da turschar a Razén. Razén ha buca obediu e la Ligia grisca ha sinaquei sclaus il signeradi da Razén dalla Ligia, entochen che quel obedeschi allas autoritads (da quella). Pia pretendeva surtut Sgier che ils subdits hagian da far nuot pli culla Ligia grisca, e Maissen carteva ch'el seigi segirs cheu cun siu amitg Sgier. Ultra da quei era Planta in adversari da Maissen e veva fatg part dalla convenziun encunter quel ils 6 da matg 1674. Maissen ei secollocaus a Domat ed ha giu cussegl sur siu process cun Muggli, Camantonia da Panaduz e Sgier e.a. surtut ella ustria dil «Vogelsang» che sesanfla sin via encunter la riva dretga dil Rein inferiur. El ha era priu viva art e part dallas damondas da Razén. Quellas duevan ussa sedecider. Planta veva denton cedi ses dretgs a Gion Travers ad Ortenstein e l'Au-

stria havess approbau Travers sco segner, mo Casati leva saver nuot dad in partisan franzos. Ussa se presenta Gion de Salis Zezras-Tirano, in dils pli rehs umens ellas Ligias, mo da character pauc adattau per quei uffeci. Casati vul saver nuot da quei um e surtut era nuot d'in Salis, schegie che quel fa tuttas operas per arrivar a Razén. El offerescha siu feagl sco spus dalla feglia da Casati. Era Gion Gudegn Capol a Flem ha queidas dil signeradi e damonda igl agid da Casati. Mo il signeradi ei quasi entir entratg catolics e Casati drova tut las stgisas ch'el anfla per untgir ora e buca stridar siu bien «Spagnol». Ussa vul Sgier dar il domini als subdits sezs, els dueièn cumprar liber tuts dretgs dall'Austria. Quella damonda e lu il process da Maissen han priu pli e pli il bien num a Sgier, e Maissen, che luvrava era encunter Travers e Capol, ha aunc fatg donn a sia atgna caussa.

Suenter che Maissen era fugius, ha il magistrat dalla Cadi concludiu da confiscar tut ses beins. Denton veva igl uestg de Mont ed era Casati cussegliau alla Cadi da buca exequir las sentenzias e schar temps per ina mediaziun. Maissen sez ei lu seviults al congress dalla Ligia grischa ed ha dumandau d'appellar als cumins dalla Ligia. El pretendeva che quella via seigi vegnida praticada era en auters cass, mo encunter quei ha mistral Caspar Latour protestau e declarau che quei seigi daventau mo en cass civils e mai encunter sentenzias criminalas. Maissen quintava dad anflar sin quella via ina maioritad dils cumins per sia dispeta. El ed era la Cadi han lu desistiu da pretender ina votaziun dils cumins. Maissen ei seprentaus als caus dallas Ligias e quels han era cussegliau alla Cadi da buca exequir la sentenza. Denton la speranza en ina mediaziun era pintga. Gia vevan Giacun de Mont a Vella e Cavalier Coray a Lags fatg l'emprova da far pasch, mo Sgier ha discussegliau a Maissen da contractar cun Mustér. Tonaton ei Maissen lu ius a Mustér. Leu han ses amitgs ed autras persunas animau el alla pasch, schizun Duitg de Latour ei ius tier Maissen ed ha supplicau el da sesuttametter alla dertgira. Sgier ha era repetiu ussa sias gomias sur la dertgiretta e cussegliau a Maissen da desister da tractativas cun las autoritads dalla Cadi. Puspei ei Maissen fugius ord sia patria, mo ha lu tarmess anavos Sgier per tractar culs derschaders. Quels han dumandau la summa da 5000 renchs che duevan cuvierer las enor-mas expensas che Maissen veva caschunau alla Cadi. Sgier ha targlinau e la dertgira ha desistiu da marcar cun Sgier. Aunc inagada han ins empruau dad intermediar da s. Gieri 1676. Cheu rimna Maissen sur ura 2-300 umens a Domat e sin via encunter la Cadi e marscha cun sia truppa encunter Mustér a cumin, per seprentar leu al pievel e defender siu far e demanar. Il pievel vul saver nuot da Maissen. 1800 umens armai arrivan a

cumin. Sin quei sto Maissen fugir cun sia truppa. Malgrad tut quei sede-  
purtar damonda Maissen (6 da zercladur 1676) dils treis caus da far desi-  
ster dalla execuziun dalla sentenza, entochen che Casati, ch'era absents,  
seigi turnaus ellas Ligias.

Il magistrar dalla Cadi veva ussa avunda ed ha pretendiu dils caus da se-  
questrar tut la facultad da Maissen en Lumnezia, a Domat en Valtlina etc.  
Ussa scriva Maissen siu «Manifest» (finius ils 26 da fenadur 1676). En quel  
selamenta el, con miserabel ch'el vegni tractaus dil magistrat dalla Cadi,  
Sia atgna cuolpa emblida el ni risguarda el buc. Era la decisiun dallas vi-  
schnaucas dalla Cadi vegn buca endamen ad el. Il magistrat ha dau ina  
risposta e motivau sias decisiuns. Maissen vegn characterisau sco in um  
da gronda ambiziun e luschezia, che stridi en siu secuntener igl um cu-  
min. Avon la dieta (Bundstag) dil settember 1676 a Cuera ha siu defensur,  
cusseglier Köhl da Cuera, purtau tgisa encunter la Cadi. Duitg de Latour  
ha refutau quella ed accentuau ch'il magistrat dalla Cadi sappi buca tole-  
rar, ch'auters cumins semischeidien en in conflict da dretg penal. L'in-  
fluenza dils Salis e da lur aderenza fageva esser precauts il magistrat;  
mo malgrad tuts risguards ha el dau part ils 7 da november 1676 als cu-  
mins, ch'el laschi aunc inaga temps a Maissen entochen ils 18 da novem-  
ber 1676 per segiustificar avon la dertgira criminala. Treis umens astgien  
cumpignar el ella Cadi. Maissen ha puspei vuliu humiliar ils umens dil ma-  
gistrat ed ha tschentau sias cundiziuns; ils caus han empruau dad inter-  
mediar ed ils plevons dalla Surselva han puspei priu ferm partida per  
Maissen. Sulet il plevon da Sumvitg (Genelin) ha criticau il landrechter ed  
ei vegnius citaus a Cuera avon la dertgira ecclesiastica ed ha survegniu  
perschun. Quei eran ils fretgs da 1651 e 56. Maissen veva da sia vart per-  
sequitau igl avat e tgisau quel tiel nunzi cun la speranza che Adalbert de  
Medell vegni citaus a Ruma e relaschus sco avat. Il nunzi Cybo «per anti-  
che piche e mal inclinatione alla fatione del partito di s. Maissen» suste-  
neva Sgier e fageva smanatschas a tuts adversaris (Carlo Casati,  
27.11.1681). La dertgira dalla Cadi ha ussa citau aunc inagada Maissen, el  
ei era ussa buca cumparius ed ha refusau l'entira tgisa; la dertgira ha dau  
sia sentenza finala. Alla fin da quella declara ella Maissen per procrets  
(vogelfrei) ed empermetta a mintgin, che porti siu tgau, ni in mussament,  
ch'el hagi mazzau el, in premi da 400 renschs. Maissen ei seviults als caus  
dallas autras duas Ligias, quels han supplicau la Cadi da refierer l'execu-  
ziun dalla sentenza. Maissen ha scret ina nova defensiun da siu demandar.  
Ils caus han anflau la sentenza dira e greva. Maissen veva surduvreu la  
pazienza dallas autoritads e da siu pievel, la sentenza corrispundeva al  
dretg criminal dil temps. Ils aspects per Maissen eran trests, ina via per la

pasch era strusch pli d'anflar. Maissen stueva ussa renconuscher, ch'era ses amitgs ed auters adherents sco ils Salis, gl'uestg etc. savevan urbir nuot pli. E tuttina batteva Maissen vinavon e patertgava da s'approximar als Franzos e cun agid da quels (ils Salis) caschunar ina revoluziun ellas Ligias, derscher las autoritads e cun quella caschun ruinar la posiziun digl avat da Mustér e derscher siu domini ella Cadi. Per realisar quell'idea eran medemamein las relaziuns a Razén favoreivlas. Cun tals patratgs veva el bandunau la cuort digl uestg a Cuera ils 26 da matg 1678. Sin via a Domat vegn el assassinau.

### *Valetaziun finala*

Tenor Castelmur (pag. 4, 93, 96 e s.) duessen ils umens dil magistrat finalmein haver priu la resoluziun da far fin cun Maissen. Sias errurs ni ses delicts e siu sedepurtar visavi ses convischins (Romeias e de Tuor) e surtut visavi il stadi dalla Cadi seigien buca la raschun da sia mort, mobein las relaziuns politics dil temps (p. 4, 99). Castelmur vul schar cumparer Maissen sco figura tragica dil temps, innocenta e nunculpeivla da tuts delicts, ch'ella ha avon la historia. Da l'autra vart inculpescha Castelmur ils umens dil magistrat e gl'avat Adalbert ton pli grevamein. Tut lur mira ni intenziun ei da ruinar Maissen. Era il mazzament da Maissen ei l'ovra instradada dil magistrat e digl avat. Quei ei ina inculpaziun veramein greva, che vul clars mussaments. Co stat ei cun quels. –

Martin Ber e Gion Zein da Tujetsch, che han assassinau Maissen denter Cuera e Domat, han mai inculpau il magistrat ni igl avat, che quels hagian dau ad els dus il cussegl ni il camond da mazzar Maissen. Fuss quei daventau, sche vessen Sgier ed auters, surtut ils representants dallas autras duas Ligias fatg da saver quei cun aulta vusch. Sgier, che ha sez priu envesta dils documents dalla dertgira (administratur da Razén), pretenda tuttina quei, mo senza mussaments. El sa era buca sorprendere la responsabladad per ses suspects e recamonda a sias persunas da confidanza, da buca raquintar quei pli lunsch, el tema da stuer purtar la responsabladad per sia tschontscha, siu suspect, ch'ei naschius ord sia pissiun encunter ils umens dalla Cadi. Aunc meins confidanza mereta Jörg Schneller da Favugn, sch'el di, ch'ils dus umens da Tujetsch hagian giu il camond en scret e cun il sigil dil magistrat dalla Cadi. En in tal cass havess la dertgira el signeradi da Razén buca spargnau da sevolver encunter ils umens dalla Cadi e far enconuschent lur cuolpa agl'entir pievel dallas Ligias. Tut las inculpaziuns da Castelmur ein ni fundadas ni documentadas.

Ver eis ei che Martin Ber e Gion Zein han enconuschiu la sentenza, che proscribeva (vogelfrei erklären) Maissen e ch'els han vuliu fadigiar ils 400 renschs, che la dertgira veva decretau agl executur dil truaument. Il motiv da lur agir ein ils daners. Quei ei trest avunda. Il historiograf ha negin dretg dad inculpar autras persunas mo sin fundament da suspects ni supposiziuns; el sto ver la cunscienza d'in ver derschader. Era il suspect sin Gion Gudegn de Capol ei nungustificaus. Vul il historiograf exprimer quel, sche ha el l'obligaziun da dir claramain: «Gl'ei in suspect e buca verdad historica documentada». Banduna el quellas vias, sche daventa siu tractat mo memia savens polemica e demuossa a tgei intent ella duei survivir. Ina tala lavur ei tendenziusa e provochescha adina la critica, per tgei il carstgaun vul e batta per verdad e justia. Remarcar sto il lectur, che Castelmur inculpescha igl avat e ch'el ei buca sedaus breigia da leger sia correspondenza che schai els archivs dallas claustras a Ruma. El lauda gl'uestg senza examinar ils documents sur sia administraziun digl uestgiu e quels che pertuccan ils eveniments da 1655 e 56. El accentuescha bugen il susteniment che las Ligias dalla Casa da Diu e dallas dertgiras han dau a Maissen, senza observar ils clars motivs da quella tenientscha e la politica dils Salis (Gion de Salis), che lavuran encunter la Cadi ed encunter gl'avat Adalbert de Medell. Era las relaziuns digl uestg de Mont culs Salis ein buca explicadas. Ei maunca en general il fundament per dilucidar l'entira epoca historica da Maissen e siu conflict. Siu paregl cun Genatsch finalmein ei dil tut deplazzaus ed ei ina errur nuncapeivla. Bein luvrava era Genatsch cun gronda pissiun, mo quella era fundada sil patratg dalla patria, dalla libertad ed independenza da siu pievel. Maissen metta sia pissiun en survetsch da sias pretensiuns persunalas per honors ed uffecis. In'idea sco fundament da siu far e demanar savein nus strusch constatar. Castelmur pretenda che Maissen seigi staus il capomenader dils catolics, mo el emblida da documentar quei ed era che ses collaboraturs da 1673 vulan strusch luvrar cun el vinavon e che Gallus de Mont vala tochen la mort 1674 per il ver menader dils interess dils catolics e digl uestgiu.

Igl ei buca lev da numnar e documentar ils merets da Maissen per sia patria e per siu pievel. Siu cumbat encunter las autoritads dalla Cadi ei memia impressiunonts. Sia ambiziun, sia stinadadad, sia discordia ed inimicezia cun siu agen pievel han dau da plidar e strusch sias ovras per il beinstar general. E tuttina havess il historiograf Castelmur astgau far in'emprova da ponderar sia impurtonza humana ella veta cun siu pievel, el anfla denton errurs principalmein da tut ses adversaris e buca in giudezi bein ponderau sur Maissen sez e siu viver. —

- 1) Anton von Castelmur. Landrichter Nikolaus (Clau) Maissen. Ein Beitrag zur Bündnergeschichte des XVII. Jahrhunderts. Chur 1929. (SA. aus: Jahresbericht der Historisch-antiquarischen Gesellschaft Graubünden, Bd 58).
- 2) Caspar Decurtins. Landrichter Nikolaus Maissen. Ein Beitrag zur Geschichte des Bündner Oberlandes. o.O. 1879.

Rem. red.: Diversas alineas, ils tetels intermediars e las notas marginals derivan dalla redacziun.